

PREDRAMAZANSKE PORUKE

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji nestrpljivo očekuju početak mjeseca Ramazana.

Braćo moja u Dini Islamu! S obzirom da nam se bliži mjesec Ramazan i da je ovo zadnja predramazanska hutba, danas želim s vama da podijelim par informacija vezanih za naše džematske ramazanske aktivnosti, te dio dopisa koji samo dobili od Rijaseta IZBiH, u obliku predramazanskog savjetovanja.

Na samom početku želim da podsjetim da mjesec Ramazan nastupa u srijedu navečer 18. februara, kada ćemo klanjati i prvu teraviju. Iako u ramazanskoj vaktiji nije upisana prva teravija, želim naglasiti da ćemo svaku teraviju, kao i zadnju jaciju pred Bajram, klanjati 1 sat i 45 minuta nakon akšama. Smatramo da je to dovoljno vremena da se može stići na teraviju, pri čemu napominjem da je teravija nafile (dobrovoljni namaz) i da nije uslov da se klanja u džamiji, već se može klanjati i kod kuće. Naravno, ovo nije poziv da ostanete kod svojih kuća, jer su nam ramazanska druženja posebno važna, već poziv da ne propustate teraviju ako ih nekog razloga niste u mogućnosti da dođete u džamiju, jer je nagrada za redovno klanjanje teravije velika.

Prvi dan ramazanskog posta je četvrtak, 19. februar. Ko nije preuzeo Ramazansku vaktiju, može je preuzeti nakon džume. Kada su u pitanju iftari, mislim da smo svi dobro upoznati sa nagradom koju imaju oni koji drugima prirede iftar. U tom smislu iftarska druženja daju posebnu čar ramazanskoj atmosferi, te jačaju prijateljske, rodbinske i komšijske veze. S tim u vezi želim da naglasim da, zbog manjka prostora, naš Džemat ove godine neće organizovati džematske iftare, ali će svoje prostorije staviti na raspolaganje svima onima koji žele da organizuju iftare za više gosti, a koji kod kuće nemaju dovoljno prostora. Za organizaciju tih, nazovimo ih privatnih, iftara dovoljno je da informišete nekoga iz odbora, te da nakon iftara naše prostorije iza sebe ostavite čistim.

Mukabelu ćemo kao i prethodnih godina učiti prije teravije, kao i petkom prije džume. Vazovi su planirani nakon teravije, dok ćemo petkom ponavljati hutbu. Tevhid pred dušu rahmetli Izeta Nanića tradicionalno učimo treće subote u Ramazanu nakon teravije. I, također tradicionalno, planirat ćemo program za Lejletul-Kadr, kada ćemo završiti mukabelu i sevape pokloniti našim vakifima.

Što se tiče Sadekatul-fitra i fidje ove godine imamo samo blokove u apoenima od 15 i 25 €. Podsjećam, sadekatul-fitr se daje do pred klanjanje Bajram-namaza. A što se tiče zekata Rijaset je objavio informaciju da nisab za mjesec ša'ban, ramazan i ševval iznosi 12.619 €, što znači da je minimalni iznos zekata 315 €. Podsjećam, onaj ko ima nisab – daje zekat, a ko nema nisab – ne daje zekat. Ko ima preko nisaba, logično, dat će više. Jednostavno će podijeliti sa 40 i dobiti iznos zekata.

Eh sada ću vam, kao što sam i najavio, prenijeti dio dopisa od strane Rijaseta vezano za predramazansko savjetovanje. U dopisu između ostalog stoji slijedeće:

Ramazan je najbolje vrijeme za samoobračun i preispitivanje, za sagledavanje svoga odnosa prema emanetu vjere i obavezama koje nam je Svevišnji Gospodar propisao. Ibadeti u mjesecu ramazanu pružaju nam jedinstveno duhovno iskustvo. Dok postimo, klanjamo namaze, učimo ili slušamo Kur'an, mi izravno, srcem, dušom i svim čulima doživljavamo slast vjerovanja. Istovremeno, blagoslovljeno ramazansko vrijeme u znaku je naših intenzivnih susreta. Zajednički iftari i ramazanska druženja nisu tek formalna okupljanja. U ramazanskim danima i noćima pruža nam se prilika za otvorene i iskrene razgovore, za međusobna savjetovanja i dogovaranja, za jačanje zajedništva i služenje zajednici.

Budimo aktivni sudionici džematskih aktivnosti. Neka se ljepota ramazana i veličina posta ne prepozna samo u našim pojedinačnim ibadetima već i u društvenoj dobrobiti našeg djela. Zajednički ibadeti jačaju bratstvo, solidarnost i našu međusobnu povezanost.

Naša bogobožnost u ramazanu bit će upotpunjena davanjem zekata i sadekatul-fitra. Zekat nije samo ibadet. Zekat je temelj solidarnosti i brige za najslabije među nama. U Kur'anu se spominje u brojnim ajetima, često zajedno sa obavezom namaza. Posjedovanje imetka je velika blagodan, ali je istovremeno i velika kušnja za čovjeka. Ibadetom zekata duša se čisti od pokuđenih osobina škrtosti, sebičnosti i pohlepe, a imovina se njime čisti, štiti i uvećava.

Braćo! Svjedoci smo dramatičnih promjena u svijetu. Ne znamo šta se skriva u neizvjesnoj budućnosti, ali smo dužni svaki dan brinuti se o sebi i poduzimati mjere zaštite, koliko smo u mogućnosti. Pozivamo sve muslimane i muslimanke da se u ramazanu posebno posvete zbližavanju ljudi. Cilj nam je doprijeti do svakog našeg čovjeka i biti mu utjeha i luka spasa.

Na kraju još da podsjetimo da večeras u 20 h organizujemo omladinsko druženje sa željom i ciljem da ponovo pokrenemo omladinske aktivnosti, pa molim omladinu da se odazove na poziv, a vas roditelje molim da urgirate na njih da dođu. Također podsjećam da su prijave za umru tokom Osterferien u toku i pozivam sve zainteresovane da nam se što prije jave jer je broj mjesta ograničen.

Neka vam Dragi Allah podari svako dobro u mjesecu Ramazanu i neka vama i vašim porodicama podari puno bereketa, zdravlja i radosti. Amin.

Ramazan šerif mubarek olsun!